



SURUHANJAYA PILIHAN RAYA MALAYSIA

KENYATAAN MEDIA

BIL.7/2019

URUSAN PILIHAN RAYA KECIL (PRK) DUN N.24 SEMENYIH SELANGOR

1. Suruhanjaya Pilihan Raya Malaysia (SPR) telah menerima pemakluman rasmi daripada **Speaker Dewan Undangan Negeri Selangor, Yang Berhormat Tuan Ng Suee Lim** pada **14 Januari 2019** berhubung dengan kekosongan luar jangka kerusi **Dewan Undangan Negeri (DUN) N.24 Semenyih** berikutan kematian penyandangannya Ahli Dewan Undangan Negeri (ADUN) **Yang Berhormat Allahyarham Tuan Bakhtiar bin Mohd Nor** pada 11 Januari 2019.

2. Sehubungan dengan itu, SPR telah mengadakan Mesyuarat Khas pada hari ini dan menetapkan bahawa satu Pilihan Raya Kecil (PRK) perlu diadakan dalam tempoh 60 hari dari tarikh kekosongan mulai pada 12 Januari 2019 untuk mengisi kekosongan di kerusi DUN berkenaan.

3. Bagi maksud menjalankan PRK ini, SPR pada hari ini telah mengadakan Mesyuarat Khas dan telah menetapkan tarikh-tarikh penting seperti yang berikut :

Tarikh Keluar Writ	:	18 Januari 2019 (Jumaat)
Hari Penamaan Calon	:	16 Februari 2019 (Sabtu)
Hari Mengundi Awal	:	26 Februari 2019 (Selasa)
Hari Mengundi	:	2 Mac 2019 (Sabtu)

4. Tempoh berkempen yang ditetapkan adalah **14 hari** bermula selepas Penamaan Calon sehingga pukul **11.59 malam, 1 Mac 2019**.

5. Bagi urusan permohonan undi pos luar negara dan dalam negara, tarikh buka dan tarikh tutup permohonan adalah seperti berikut :

Tarikh Buka	:	18 Januari 2019 (Jumaat)
Tarikh Tutup	:	14 Februari 2019 (Khamis)

6. Bagi menjalankan proses pilihan raya kecil ini, SPR telah bersetuju untuk melantik **YANG DIPERTUA MAJLIS PERBANDARAN KAJANG, Y.BHG DATO' MOHD SAYUTHI BIN BAKAR** sebagai **Pegawai Pengurus Pilihan Raya Kecil DUN N.24 Semenyih**. Beliau akan dibantu oleh **EMPAT (4)** orang Penolong Pegawai Pengurus.

7. SPR juga bersetuju menubuhkan **EMPAT (4)** Pasukan Penguat Kuasa Kempen Pilihan Raya (PP-KPR) untuk memantau semua aktiviti kempen pilihan raya sepanjang tempoh rasmi berkempen. Pasukan PP-KPR ini akan dianggotai oleh wakil-wakil daripada pihak Polis, Pihak Berkuasa Tempatan (PBT), wakil-wakil calon yang bertanding dan juga pegawai SPR.

8. SPR akan menggunakan **DEWAN SERI CEMPAKA MAJLIS PERBANDARAN KAJANG, SAUJANA IMPIAN** sebagai **Pusat Penamaan Calon** dan **Pusat Penjumlahan Rasmi Undi**.

9. Untuk memudahkan proses penamaan calon, saya menggesa kepada bakal-bakal calon yang ingin bertanding dalam PRK N.24 Semenyih agar mengisi dan membuat semakan awal pengisian borang tersebut dengan pihak Pejabat Pegawai Pengurus atau Pejabat Pilihan Raya Negeri Selangor sebelum Hari Penamaan Calon. Selain itu bakal-bakal calon juga adalah dicadang untuk membuat pembayaran deposit lebih awal. Ini adalah bertujuan untuk memastikan semua proses penamaan calon pada Hari Penamaan Calon dapat diselesaikan lebih awal dan berjalan lancar.

10. Walau bagaimanapun, adalah diingatkan bahawa Kertas Penamaan Calon yang telah lengkap diisi dan disemak itu hendaklah dikemukakan oleh Calon atau penyokong atau pencadangnya semasa Hari Penamaan Calon di Pusat Penamaan Calon yang telah ditetapkan oleh SPR.

11. Seperti mana yang telah dilaksanakan pada PRK P.078 Cameron Highlands, pada PRK ini juga SPR akan turut menyiarkan secara langsung menerusi **FB live** di laman Facebook SPR mengenai proses-proses pilihan raya seperti proses penamaan calon, proses pengeluaran kertas undi pos, proses pengundian awal, proses semakan isi peti undi, proses pengundian, proses pengiraan undi dan pengumuman keputusan pilihan raya. Usaha ini adalah sebagai satu pendedahan dan kesedaran berterusan kepada masyarakat mengenai proses pilihan raya selain menunjukkan ketelusan dan keterbukaan SPR dalam melaksanakan setiap proses pilihan raya.

12. Disamping itu, SPR juga akan menyiarkan kepada umum keputusan awal PRK iaitu keputusan yang tertakluk kepada pengesahan melalui laman portal SPR dan juga paparan skrin di Pusat Penjumlahan Rasmi Undi.

13. SPR juga prihatin dengan kesulitan yang dihadapi oleh golongan Orang Kurang Upaya (OKU) pada hari mengundi. Oleh itu, pada PRK ini, golongan berkenaan akan mengundi di Saluran 1. Seramai **741 orang** pengundi OKU telah dikenal pasti dan mereka adalah berdaftar dengan Jabatan Kebajikan Masyarakat (JKM).

14. Untuk PRK ini, seramai **992 orang petugas** dilantik untuk mengendalikan proses PRK N.24 Semenyih. Manakala sebanyak **26 buah Pusat Mengundi** yang mengandungi kesemuanya **119 Saluran** akan digunakan untuk kemudahan mengundi. PRK ini dianggarkan memerlukan peruntukan **sebanyak RM1.8 JUTA**.

15. Daftar Pemilih Pilihan Raya yang akan digunakan untuk PRK ini adalah sehingga **Suku Ketiga Tahun 2018** yang dikemaskini sehingga **11 Januari 2019**. Daftar Pemilih tersebut mengandungi **54,503 orang pemilih berdaftar** yang terdiri daripada **53,520 orang pengundi biasa**, **951 orang pengundi awal** dan **32 orang Pengundi Tidak Hadir Luar Negara**. Daftar Pemilih tersebut akan mula dijual pada **12 Februari 2019**.

16. Pada tarikh yang sama, para pengundi boleh membuat semakan Daftar Pemilih untuk mengetahui maklumat pusat mengundi, saluran

mengundi dan nombor bilangan mereka melalui **laman portal SPR** (www.spr.gov.my) atau menelefon ke talian **03-88927018** atau melalui **SMS 15888** atau melalui **aplikasi MySPR Semak**.

17. Pada PRK ini juga, SPR turut menawarkan kepada mana-mana Pertubuhan Bukan Kerajaan (NGO), mana-mana badan atau individu yang berkelayakan yang berminat untuk menjalankan pemerhatian ke atas perjalanan proses PRK ini bermula dari hari penamaan calon sehingga keputusan pilihan raya diumumkan. Mereka dibenarkan untuk membuat pemerhatian seperti di pusat penamaan calon, pusat mengundi, tempat pengiraan undi dan pusat penjumlahan rasmi undi.

18. Selain itu, mana-mana badan dan individu yang berminat untuk menjadi Pemerhati Pilihan Raya Kecil ini boleh mengemukakan permohonan kepada SPR. Tarikh tutup permohonan sebagai Pemerhati Pilihan Raya ini ialah pada **31 Januari 2019**.

19. Bagi menggalakkan pengundi supaya keluar menunaikan tanggungjawab mereka pada hari mengundi, SPR akan melaksanakan kempen `Jom Kita Undi` melalui pelbagai saluran media termasuk di media elektronik, media sosial, media cetak, hebahan melalui siaraya dan pemasangan kain rentang di lokasi-lokasi strategik seperti di tempat-tempat tumpuan awam, hentian bas dan lain-lain tempat yang bersesuaian.

20. Bagi PRK ini, SPR mensasarkan **70 peratus** pengundi akan keluar mengundi. SPR juga memohon kerjasama semua pihak termasuk pihak

media dan parti-parti politik agar turut mengambil langkah untuk menyeru dan menggalakkan pengundi supaya keluar mengundi pada hari mengundi.

21. SPR juga akan meneruskan penambahbaikan seperti berikut:

- a) Disediakan **DUA (2) saluran khusus** bagi pengundi yang berumur 60 tahun dan ke atas di setiap Pusat Mengundi.
- b) **Memanjangkan tempoh masa pengundian** dari jam **8.00 pagi hingga 5.30 petang** berbanding jam 5.00 petang sebelum ini.
- c) **Menambah Pusat Mengundi Dan Saluran Mengundi.** Bagi PRK N.24 Semenyih ini sebanyak **SATU (1) Pusat Mengundi** baru diwujudkan menjadikannya **26 buah Pusat Mengundi** berbanding **25 buah** pada PRU14. Manakala sebanyak **31 saluran baru** ditambah bagi mengelakkan jumlah pengundi terlalu ramai di satu-satu saluran menjadikan keseluruhannya adalah **119 saluran** berbanding **88 saluran** pada **PRU-14**.
- d) **Penambahan petak undi** di dalam tempat mengundi (saluran) kepada **TIGA (3) petak undi**. Di mana amalan sebelumnya adalah DUA petak undi sahaja.

22. Maklumat-maklumat lain berhubung dengan pilihan raya kecil ini akan dimaklumkan dari semasa ke semasa oleh SPR.

Sekian dan terima kasih.

AZHAR AZIZAN HARUN

Pengerusi

Suruhanjaya Pilihan Raya Malaysia (SPR)

Tarikh : 18 Januari 2019 / 12 Jamadil Awal 1440H